

青青ê故事

王淑珍改寫

清風伯仔ê the仔--裡，有一樣蘋果樹。樹仔頂有一尾刺毛蟲，歸身軀青青青，伊ê名叫做青青。逐工攏孤一個恬恬佇樹仔頂teh食樹葉仔，因為樹仔頂干單伊一隻刺毛蟲niā-niā，伊無半個伴。

「唉！足想欲 chhōe 一個朋友來鬥陣 sng。」青青 tiàm 心內家己按呢teh想ê時，抵好有一隻田嬰飛了thiám啦，來歇佇伊隔壁ê樹葉仔頂。

青青看--著，真歡喜，giáh頭開嘴kā問：「田嬰仔兄，我敢會使kap你鬥陣sng？」

田嬰頭 khi-khi kā 看--一--下，真冷淡kā應講：「你生做 chiah-nih-á bái 閣無翅仔，一定 bē 曉飛，kap你鬥陣sng一定足無聊--ê，我才無愛咧！」

田嬰翅仔 iát 咧 iát 咧，閣 kā 恥笑講：「Bái-kô-kô！你是我生目睷所看過ê上báiê一個。」講煞，著做伊飛走去啦。

田嬰講 chia ê 話去傷著青青ê心，青青心內真艱苦，趕緊sô落去葉仔下腳匿--起--來。

過一táh久á，青青看見草埔仔內有一隻草螞仔，真歡喜，趕緊爬過去hām伊相借問：「草螞仔兄，我敢會使kap你鬥陣sng？」

草螞仔 àⁿ 頭 kā 看--一--下，忍 bē-tiâu 大聲笑--出--來：「哈哈哈哈哈！你看你，身軀肥 chuh-chuh，跤手仔閣 hiah-nih-á 短，無親像我，生做 chiah-nih lò 腳，腳手仔有力閣 liú-liáh。Chiah-nih 孝呆，是欲按怎參我鬥陣sng咧？」

青青 kā 應講：「哪會 bē 使？咱會使做陣sng『匿相 chhōe』啊！」

草螞仔大聲 kā 嚷講：「Hé！滾甚物sng笑，我 chiah 無愛kap你鬥陣sng『匿相 chhōe』彼款無聊ê囡仔遊戲咧！去去去！緊去 chhōe 你家己ê伴。」

青青聽了感覺真失志，無意無意，恬恬坐 tiàm 樹葉仔頂，強欲哭出來ê時，聽著一隻 am-po-chê 來歇佇樹仔頂teh唱歌，趕緊爬去

伊 ê 身軀邊，開嘴 kā 問：「Am-po-chê 姊姊，你 ê 歌聲真好聽，我敢會使 kap 你鬥陣 sng？」

彼隻 am-po-chê 一越頭看著伊，隨大聲吱--出--來，kā 趕講：「走！走！走！你 chit 個 bái 到有剩 ê m̄ 成物仔，m̄ 通 óa--過--來。」

Am-po-chê 吱到 hiah-nih 大聲，予青青驚一個倒退幾若步。青青心內真艱苦，目屎就按呢流出來，那 háu 那講：「U... 是按怎哪會攏無人欲 kap 我鬥陣 sng 咧？」

Am-po-chê 根本著無 kā 伊看佇眼內，真輕視--伊，kā 講：「你家己去照鏡看 māi 咧！生做 hiah-nih bái，閣無半滴才調，啥人欲 kap 你鬥陣 sng。我 ê 外表雖然無 súi，m̄-kú 歌喉真好，會當唱出美妙 ê 歌聲；田嬰是真 gâu 飛；草蜢仔真 gâu 跳，閣是相戰 ê 高手。阿你咧？歸工干單會曉食樹葉仔 niā-niā，阿 bē 曉飛，阿 bē 曉唱歌，阿 bē 曉參人相戰。上 ló--ê 是生做『bái 到有剩』，我 chiah 無愛 kap 你做陣 sng 咧！」

Am-po-chê 講煞，翅仔 iat-iat 咧，無閣越頭，著做伊飛走去。

青青聽了非常 ê 傷心，家己一個 tiàm hia háu 有一下仔久，心內真怨嘆：「上帝對我實在太無公平咧！為甚物賞賜予大家 hiah-nih 好 ê 禮物，獨獨干單我無得著半項。」青青愈想愈怨嘆，決定欲 kā 家己藏--起--來，無欲閣再予人看--見。伊就開始吐絲，一絲一絲，一絲一絲 kā 家己包--起--來。伊吐絲吐到真 thiám，無張無持就按呢暈--去啦。

青青一暈幾若暝日。醒--起--來了後，伊感覺心情有較爽快啦，想欲出去透一下仔空氣咧，就對彼個伊家己吐絲纏 ê 殼內底鑽--出--來。一鑽--出--來，就發現家己 kap 以前完全攏無像款啦；m̄-nā 身軀變較瘦 thio，閣生出一對五彩豔麗 ê 翅仔。伊心內想講：「Che 一定是上帝聽著我 ê 心聲，佇我 teh 暈 ê 時賞賜予我 ê 禮物，kā 我變做 súi-súi ê iah 仔。」

青青愈想愈歡喜，看家己 mā 愈看愈 kah 意，伊 táuh-táuh-á kā 翅仔展開，勻勻仔開始 iat 伊彼對美麗 ê 翅仔，飛對天頂去。伊美妙 ê 體材、跳舞迷人 ê 姿勢，siáⁿ 真濟蟲 thōa 飛 óa--來，早前看伊 bē 起 ê 田

嬰、草蟻仔 kap am-po-chê mā 相爭飛來到伊 ê 面頭前。大家直直 kā 呵咗，相爭欲 kap 伊 chhit-thô。洶洶，聽著一個軟 chiáⁿ、phih-phih-chhoah ê 聲音：「Iáh 仔姑娘，你真 súi，我敢會使 kap 你鬥陣 sng？」原來是匿佇樹葉仔下面 ê 一隻生做烏閣 bái 閣粗 ê 刺毛蟲。

田嬰搶 teh kā 應：「Iáh 仔姑娘 chiah-nih súi，哪有可能 kap 你 chit 款生做烏閣 bái 閣粗 ê 刺毛蟲鬥陣 sng 咧！緊走！緊走！Mài tiàm hia 做眠夢。」

Am-po-chê 佇邊仔插嘴，真無情 kā 講：「著是啊！緊走！緊走！阮無人欲 kap 你鬥陣 sng！」

草蟻仔雙手 giáh kôan-kôan，直直 kā póe，想欲 kā 趕走。刺毛蟲驚一下，放聲開始大聲 háu。

「請大家 m̄ 通按呢對待--伊。」Iáh 仔 sit 緊飛去刺毛蟲 ê 身軀邊，牽伊生做短短 ê 手，kā 講：「我真歡喜 kap 你鬥陣 sng。」

田嬰、草蟻仔、am-po-chê 三個佇邊仔看 iáh 仔按呢做，攏想 bē 曉，就 kā iáh 仔問講：「你是按怎欲 kap chiah-nih bái ê 刺毛蟲做朋友咧？按呢敢 m̄ 是無合你 ê 身份咧？」

Iáh 仔歹勢歹勢 kā 應講：「恁敢成實攏 bē 認得我？我就是刺毛蟲青青啊！」

田嬰、草蟻仔、am-po-chê 三個聽一下，攏掣一tiô，目睭展到大大蕊，攏 m̄ 相信目睭前 chit 隻 súi-iⁿ-iⁿ ê iáh 仔竟然是以前彼隻 bái-kô-kô ê 刺毛蟲青青變--ê。

Iáh 仔安慰彼隻刺毛蟲講：「以前我 mā kap 你全款，生做真 bái，攏交無朋友，無人欲 kap 我鬥陣 sng。請你 m̄ 免傷心，後日仔你著會 kap 我全款，變成一隻 súi-súi ê iáh 仔啦。」

邊仔 ê 田嬰、草蟻仔 kap am-po-chê 聽了，攏感覺真見笑，歹勢到面仔紅記記，kā iáh 仔講：「真失禮！進前阮攏無愛 kap 你鬥陣 sng，閣講真濟予你傷心 ê 話。請你原諒阮 m̄-bat 代誌。後擺，阮 bē 閣再看無起刺毛蟲啦。請你 kap 阮鬥陣 sng，好--無？」閣越頭對刺毛蟲

講：「真失禮！害你 chiah-nih 傷心，你敢猶願意 kap 阮做朋友？」Iah 仔 kap 刺毛蟲聽了攏真歡喜，直直tim 頭。

自按呢開始，所有 ê 刺毛蟲無閣再為著家己生做 bái 感覺自卑，個逐工攏 teh 期待，緊得著上帝賞賜 ê 禮物，心內開始有快樂 ê 向望。田嬰、草蜢仔 kap am-po-chê mā 無閣再看輕人 ê 外表啦。